


**TEZAUUR LITURGIC**

**10 IUNIE**

**ACATISTUL  
SF. MUCENICI  
ALEXANDRU  
ȘI  
ANTONINA  
DE LA  
CONSTANTINOPOL**



**MOSCOVA, 2000**



# Акафист

## СВЯТЫМ МУЧЕНИКАМ

### Александрю и Антонине

#### Кондак 1

Избрании из пределов римских, святии мученицы, за Господа Иисуса Христа много пострадавшии, воспоминающе о благоявлении святаго исповедания вашего, мы умиленно Бога хвалим: Аллилуиа.

#### Икос 1

Ангела Господь послал есть, во укрепление лествицы спасения, предвидя велие рачение ваше. Вы же Христа исповедующе, живот вечный обрели есте. О вашем спасении радующесе, отверзше сердечная уста, преоруженно глаголем:

Радуйтесе, исповедницы славнии;

радуйтесе, Бога сосуды избраннии.

Радуйтесе, дивнии мученицы;

радуйтесе, Духа Божия ученицы.

Радуйтесе, во Христе духовнии сродницы;

радуйтесе, друг друга чуднии заступницы.

Радуйтесе, живот бренный за Господа отдавшии;

радуйтесе, в животе вечнем с Богом

возсиявшии.

Радуйтесь, Александре и Антонино, дивнии святии мученицы.

## **Кондак 2**

Видяще неколебимое стояние ваше в вере Христовою и ея проповедание подвигом пламенным, Ангели Божии цветуще стройне зывают: Аллилуиа.

## **Икос 2**

Разум духовный стяжавше, безумных, непреподобных обличили есте, Истиннаго Бога прославили есте, идолов бесовских посрамивше. Каменю твердыни вашей о Бозе дивимся, крепость духовную смиренно воспеваем:  
Радуйтесь, спасение испросившии;  
радуйтесь, диавола Силою Божию победившии.  
Радуйтесь, безумие языков обличившии;  
радуйтесь, венцы небеснии получившии.  
Радуйтесь, избранницы святии;  
радуйтесь, мученицы блазии.  
Радуйтесь, Православия поборницы;  
радуйтесь, исповедания светильницы.  
Радуйтесь, Александре и Антонино, дивнии святии мученицы.

### **Кондак 3**

Силою Божия благодати неуклонно Христа исповедали есте, мучения лютии терпевше, Богом укрепляемии, духом горевше, победу над смертию одержали есте, и ныне в Обителях Горних воспеваете: Аллилуиа.

### **Икос 3**

Имущи в сердце Господа Иисуса Христа, Антонино дево, издетска благочестие сохранившая, нечестиваго Фиста, диаволеслужителя, ты не убоялася еси. Лщения бесовския отвергаючи, Господа полным сердцем исповедала еси, с любовью о Нем возвещаючи. Исповеданию твоему, цветоче целомудрия, дивимся и словесам твоим паки радуемся: Радуйся, веры Христовыя ревнительнице; радуйся, идолов диаволских разрушительнице. Радуйся, молитвы денныя и нощныя кадельнице; радуйся, чистоты духовныя хранительнице. Радуйся, дево благочестивая; радуйся, нечестие победившая. Радуйся, твердости духа учительнице; радуйся, Духа Святаго носительнице. Радуйтеся, Александре и Антонино, дивнии святии мученицы.

#### **Кондак 4**

Бурю безумия диавола вы сокрушили есте, ко Господу неустанно взываше. Силу неодолимую обрели есте, с любовью огненной Христом укрепляемии. Дивен Господь во святых Своих: Аллилуиа.

#### **Икос 4**

Слышаще глас ангельский, доблести честная похвало, воине святой Александре, Господа всею душею прием, неусомненно пошел еси ты по стези исповедания. Ведая Христос доброту души твоя, избрал есть тебя на служение, с верою Господне благословение до конца ты исполнил еси, сподобив нас глаголати таковая: Радуйся, воине смиренный; радуйся, во Христе укрепленный. Радуйся, Ангела на земли собеседниче; радуйся, стойкости духовныя в подвиге своем проповедниче. Радуйся, глаголов ангельских исполнителю; радуйся, послушания смиренный учителю. Радуйся, целомудрия ограждение; радуйся, Церкви Святыя украшение.

Радуйтесь, Александре и Антонино, дивнии святии мученицы.

#### **Кондак 5**

Боготечною звездою подвиг ваш в земли римской просиял есть, Господу Иисусу Христу в

прославление, демонству языков в посрамление.  
Зряще красоту победы сия, Бога ублажаем:  
Аллилуиа.

### **Икос 5**

Видевый Фист, игемон неистовый, чистоту твою,  
Антонино, на поругание людем своим предал тя  
в злобе бесовстей, но Господь сохранил есть  
девство твое, диавола отвратив, душу невинную  
в руцы прием, ю принесл есть в Чертози  
Блаженнии. Сему чуду мы, из сердца  
радующеся, устнами песенне возглаголем:  
Радуйся, небесная послушнице; радуйся, Христа  
Бога нашего слушательнице. Радуйся, Евангелия  
исполнительнице; радуйся, Господа Иисуса  
Христа на земли зрительнице. Радуйся, мучения  
крепко претерпевшая; радуйся, Христу при  
оних певшая. Радуйся, Христом направляемая  
на спасение; радуйся, светильнице терпения.  
Радуйтесь, Александре и Антонино, дивнии  
святии мученицы.

### **Кондак 6**

Проповедницы Христовы, мучений не убоясте,  
веру истинную исповедали есте, в сердце  
непрестанно глаголюще: Аллилуиа.

## **Икос 6**

Возсиял еси воин Христов, бремя идолов  
низложив, Ангелем званый, небесных речений  
вкусивый, очи с предвыспренней на Небеси  
устремил еси, мучений жестоковыйных не чуж.  
Влекомый Божию благодатию, молчанием  
загради уста своя, душею молитву преискренне  
воспевая. Спасению твоему, мучениче святой  
Александре, о Бозе радуемся и хвально поем  
тебе сицевая: Радуйся, светлый воине земный;  
радуйся, святой воине небесный. Радуйся, веры  
истинныя приятелю; радуйся, спасения  
достойный получателю. Радуйся, христианом  
защитниче; радуйся, неустанный на Небесех  
молитвенниче. Радуйся, неправды обличителю;  
радуйся, правоверных попечителю.  
Радуйтесь, Александре и Антонино, дивнии  
святии мученицы.

## **Кондак 7**

Восхотел еси, Господи, праведных спасти, души  
юныя к Себе призвал еси, рабем Своим урок  
исповедания православныя веры являяй.  
Мученицы младии веру Христову не поругаша,  
бреннаго тела не пожалевше, на земли отверзли  
суть Райския двери, дабы Господу непрестанно  
пети: Аллилуиа.

## **Икос 7**

Новая имена возвел еси, Господи, на Небеси святых мучеников Александра и Антонины, на заре православней за Тя премного пострадавших, в болезнях тяжких убиенных, но Тобою навечно в Небесном Царствии спасенных. О сем сквозе многая веки ныне воспеваем таковая:

Радуйтесь, страдания терпевшии;  
радуйтесь в них ко Христу горевшии.  
Радуйтесь, юности не пожалевшии;  
радуйтесь, идолов лукавых одолевшии.  
Радуйтесь, вернии Христовы Агнцы;  
радуйтесь, стяжавшии небеснии венцы.  
Радуйтесь, христианом верным утешение;  
радуйтесь, Православия утверждение;  
Радуйтесь, Александре и Антонино, дивнии святии мученицы.

## **Кондак 8**

Странное чудо явил еси, Господи, вещая гласом Своим, на подвизи мучеников укрепляяй, и Сам на землю снишел еси, пред святей Антониной девой предста, ея же на спасение с любовью благославляяй. Слава Тебе, Иисусе Премилостивый: Аллилуиа.

## **Икос 8**

Вси Безплотныя Силы с замиранием созерцают глубину подвига вашего, егда приясте вы мучения тяжкия: руцы ваши ссекоми быша безумцы нечестивыми, невинная телеса огнем жегоми неистовым, во свидетельство Истины Христовыя, благодатию души ваши неизреченною Небесною прохладою внутрьду палившею, пытки огненныя охладившею, боль телесную обратившею в духовное здравие. Сему чуду мы умиленно дивимся и радостно воспеваем:

Радуйтесь, мучений не убоявши;  
радуйтесь, за веру с любовью пострадавшии.  
Радуйтесь, благодатию Божией палимии;  
радуйтесь, Духом Божиим хранимии.  
Радуйтесь, телес младих не пожалевшии;  
радуйтесь, Христа на земли духом зревшии.  
Радуйтесь, Христом в подвизе соединеннии;  
радуйтесь, в единстве сем спасеннии.  
Радуйтесь, Александре и Антонино, дивнии святии мученицы.

## **Кондак 9**

Всякая мучения претерпевше, от Господа Иисуса Христа не отреклися есте, Ангели Божии свидетелми твердости духа вашего быша. Мы же, грехом пораженнии, о подвизе вашем

воспоминающе, к Богу нашему всехвально  
взываем: Аллилуиа.

### **Икос 9**

Ветии многовещании, яко рыбы безгласныя  
умрут в оскудении словеснем, не имуще глаголов  
велиих, дабы красоту спасения вашего описати.  
И мы, токмо крупицу нищия разумеюще,  
смиренно с велицею радостию глаголем  
сицевая:

Радуйтесь, подвижницы неизреченнии;  
радуйтесь, диаволом не уязвленнии.

Радуйтесь, плоть брENNую поборовшии;  
радуйтесь, в благодати Божией возросшии.

Радуйтесь, страстей телесных усмирители;  
радуйтесь, диавола злаго победители.

Радуйтесь, молитвы неустанное пение;  
радуйтесь, мучеников святых украшение.

Радуйтесь, Александре и Антонино, дивнии  
святии мученицы.

### **Кондак 10**

Спасти хотяще души своя, на мучения отдасте  
чресла свои, с верою страдания претерпевше, на  
лоно Авраамле победно введени быша. И наши  
души христианския сами спасаете ныне, к Богу  
одесную припадающе и ангельски вопиюще  
Ему: Аллилуиа.

## **Икос 10**

Стена есть святая молитва ваша, христианом в волнах мірских обуреваемым, и повдиг ваш блазий – пример веры истинныя. Во исповедании Христовом нас укрепите, Господа Иисуса Христа умолите о спасении нас, грешных, пред вами с надеждою предстоящих и сокрушенно хвалящих святое заступление ваше: Радуйтесь, молитвенницы неугасимии; радуйтесь, заступницы, неустрашимии. Радуйтесь, веры истинныя стяжатели; радуйтесь, правил крепости духовныя показатели. Радуйтесь, Христом на Небесех пасомии; радуйтесь, на земли пастыри незримии. Радуйтесь, сподвижницы чудеснии; радуйтесь, помощницы небеснии. Радуйтесь, Алекснадре и Антонино, дивнии святии мученицы.

## **Кондак 11**

Песнь духовную о вашей победе возносим, яко вы во мраце идолском не утопасте, Свет Превечный прияли есте, Ему же словеса благодарения воспевающе: Аллилуиа.

## **Икос 11**

Светозарная свеще вы есте на пути спасения нам, слепым в мире сем, во гресех

пребывающим, но на милосердие Божие  
уповающим и с победою в гласе своем  
возвещающим о спасении вашем:  
Радуйтесь, наши духовнии покровители;  
радуйтесь, душ смиренных благоукрашители.  
Радуйтесь, звезды духовнии яркии;  
радуйтесь, молитвенницы жаркии.  
Радуйтесь, со Ангели купно воспеватели;  
радуйтесь, припадающим к вам спасению  
научатели.  
Радуйтесь, Господа Иисуса Христа  
благовестители;  
радуйтесь, спасения нашего неусыпные  
просители.  
Радуйтесь, Александре и Антонино, дивнии  
святии мученицы.

### **Кондак 12**

Благодать заступничество ваше незримо дарует,  
яко вы внемлите просящим спасения и  
непрестанно Богу о рабех Его молитесь.  
Помолитесь и о нас, грешных, чрез образа ваши,  
на вас смиренно взирающих и слезно Богу  
вопиющих: Аллилуиа.

### **Икос 12**

Поюще страдание ваше, Силою Духа  
наполняемся, видяще победу вашу, устнами  
радостно изливаемся. Яко мед сладкий, слава

ваша в молитве течет и глаголы цветочные  
преискренне дарует:

Радуйтесь, любви безбрежный океане;

радуйтесь, бесовом лютым изгнание.

Радуйтесь, страждущим утешение;

радуйтесь, плачущим смирение.

Радуйтесь, алчущих накормители;

радуйтесь, жаждущих напоители.

Радуйтесь, малодушных укрепление;

радуйтесь, немощных защищение.

Радуйтесь, Александре и Антонино, дивнии  
святии мученицы.

### **Кондак 13**

О святии исповедницы Христовы Александре и  
Антонино, не оставите нас, грешных, в бедах и  
скорбех житейских сущих, но молитвами своими  
нас от сетей диаволских оградите, подвигом  
своим очи наши духовнии просветите, и на путь  
неблазненнаго и крепкаго исповедания веры  
православныя, нас грешных, наставите. Мы же  
о вас Господа нашего Иисуса Христа, от нищеты  
духовныя, богато славим: Аллилуиа.

Сей кондак глаголи трижды

